

四庫全書

子部

欽定四庫全書

名賢氏族言行類稿卷二十二

宋 章定 撰

楊 四百三十三

姓纂周武王子唐叔虞封於晉出公遜於齊生伯僑  
歸周天子封為楊侯子孫以國為氏一云周宣王曾  
孫封為晉所滅其後為氏或曰周景王之後楊氏叙  
云伯僑不知周何別也

荀子楊朱哭衢塗曰此夫過舉踴步而覺

說苑楊朱見梁王言治天下如運諸掌

楊回見趙簡子曰臣居鄉三逐事君三去聞君好士故  
走來見簡子曰盛德之士亂世所疏也遂授以為相  
而國大治

史記酷吏楊僕以嚴酷為主爵都尉 前漢傳楊僕宜  
陽人

前漢楊敞華陰人為軍司馬 遷大司農後為丞相封

安平侯 子忠忠弟憚 憚字子幼以忠任為郎好  
交英俊諸儒名顯朝廷作南山種豆之詩詩眼云古  
人學問必有師友淵源漢楊憚一書迥出當時流輩  
則司馬遷外甥故也

楊王孫厚自奉養生亡所不致 羸葬矯世

楊雄字子雲蜀郡成都人其先出自周伯僑以支庶初  
食采於晉之楊因氏焉少好學不為章句簡易佚蕩  
口吃不能劇談默好深湛之思不汲汲于富貴不戚

戚於貧賤博極羣書度越諸子三世不徙官以耆老  
次轉為大夫 寂寞投閣 家貧嗜酒好事者載酒  
肴從游學 斟酌六經 楊雄仕漢親蹈王莽之變  
退託其身於列大夫中不與高位者同其死抱道沒  
齒與晏子同科世儒或以劇秦美新貶之是不然此  
雄不得已而作也夫誦述新莽之德止能美於暴秦  
其深意固可知矣序所言配五帝冠三王開闢以來  
未之聞真以戲莽爾使雄善於諛佞撰符命稱功德

以邀爵位當與國師公同列豈固窮如是哉

見容齋隨筆

後漢楊厚字仲桓父統習天文推步之術為彭城令一

州大旱統推陰陽消伏縣界蒙澤太守使統為郡

求雨亦即降澍厚少學父業三遷侍中後歸家教

授門生上名錄者三千餘人年八十二卒鄉人謚曰

文父

楊璇字璣平舉孝廉遷零陵太守制馬車以破賊

楊終字子山成都人習春秋顯宗拜校書郎著春秋

外傳十二篇

楊震字伯起明經博覽無不窮究諸儒語曰關西孔子  
楊伯起 後有冠雀銜三鱣魚飛集講堂前都講取  
魚進曰蛇鱣者卿大夫服之象也數三者法三台也  
先生自此升矣遷荊州刺史東萊太守所舉王密懷  
金遺震曰暮夜無知者震曰天知神知我知子知何  
謂無知轉涿郡太守公廉不受私謁子孫常蔬食步  
行故舊欲令開產業震不肯曰使後世稱為清白吏

子孫後為太尉 子秉字叔節明易自為刺史二千石日受俸餘祿不入私門故吏賣錢百萬遺之閉門不受遷尚書為太尉性不飲酒早喪夫人遂不復娶所在以淳白稱常言曰我有三不惑酒色才也 子賜字伯獻遷侍中侍講于華光殿七在卿校殊位特進五登袞職 子彪字文先遷京兆尹為司徒復為太尉 子脩字德祖好學有俊才自震至彪四世太尉德業相維為東京名族



儒林楊政字子行受梁丘易善說經書京師語曰說經  
鏗鏗楊子行嗜酒不拘小節果敢自矜然篤於義

楊倫字仲理少習尚書後出補常山王傳以疾自上曰  
有留死一尺無北行一寸刎頸不易九裂不恨匹夫  
所執強於三軍固敢有辭

楊仁字文義習韓詩舉孝廉除為郎太常上仁經中博  
士顯宗引見問當世政迹上便宜十二事

方術楊由字袞侯少習易并七政元氣風雲占侯為郡

文學掾其言多驗

魏志楊俊字秀才舉茂才為安陵令遷南陽太守宣德  
教立學校吏民稱之再守南陽恩德流著殊隣異黨  
襁負而至 宜還本朝宣力輦轂熙帝之載

楊阜字義山為武都太守為政舉大綱已而文帝問其  
何如人皆稱阜有公輔之節明帝不法服不以見阜  
每朝廷會議阜常侃然以天下為已任

蜀志楊儀字威公襄陽人先主與語論軍國計策政治

得失大悅之諸葛亮出軍儀規畫分部籌度糧穀不稽思慮斯須便了軍戎節度取辦於儀

楊洪字季林為蜀郡太守衆事皆辦忠清欸亮憂公如家事繼母至孝

楊戲字文然為督軍從事職典刑獄論法決疑號為平當後領梓潼太守未嘗以甘言加人過情接物

楊方字公同少好學有異才初為郡鈴下威儀公事之暇輒讀五經賀循曰如方者乃荒萊之特苗鹵田之

善秀姿質已良但沾染未足再後為東安高梁二郡  
太守

楊佺期漢太尉震之後曾祖準太常自震至準七世有  
名德佺期沉勇果勁兄廣及弟思平皆彊獷麤暴  
自云門戶承籍江表莫比

楊文宗武元皇后父其先仕漢四世為三公

隱逸楊軻少好易學業精微養徒數四疎賓異客音旨  
未曾交也隱於隴山

南史楊公則字君翼除晉壽太守清潔自守遷扶風太守授湘州刺史為政雖無威嚴然勵已廉慎為吏人所悅

北史楊大眼武都氏難當之孫少驍捷跳走如飛李冲曰千載以來未有逸材若此遂用為軍主大眼謂同僚曰今日所謂蛟龍得水之秋自茲一舉不復與諸君齊列矣所經戰陣勇冠六軍自為將帥恒身先兵士當其鋒者莫不摧拉淮泗荆沔之間童兒啼者

恐之云楊大眼至無不即止 為荊州刺史荆蠻相  
謂曰楊公惡人遂不敢復為寇盜

楊播字延慶華陰人賜爵華陰子進爵為伯為華州刺

史 子侃字士業除侍中 播弟椿字延壽太保侍

中卒贈太師之嘗誡子孫曰汝家仕皇魏以來乃

有七郡太守三十二州刺史內外顯職時流少比汝

等若能存禮節不為奢淫驕慢假不勝人足成名家

子昱字元略後除鎮東將軍 椿弟津字羅漢除

岐州刺史巨細躬親孜孜不倦僚佐有贖貨者未曾  
公言其非常以私書切責之於是官屬感厲莫有犯  
法除定州刺史時賊殘掠州境津置爐鑄鐵持以灌  
賊賊遂相告曰不畏利槩堅城唯畏楊公鐵星子  
適字山才累遷尚書左丞適弟逸字遵道有當世  
才遷秦州刺史時年二十九方伯之少未有先之者  
改光州刺史時災儉以倉粟賑給將死而濟者萬數  
廣設耳目善惡畢聞咸言楊使君有千里眼逸弟

謚字遵和歷衛將軍弟愔字遵彥從兄昱謂人曰  
此兒駒齒未落已是我家龍文更十歲後當求之千  
里外仕齊累遷尚書令典選二十餘年獎擢人物以  
為已任然取士多以年貌時致謗言以為愔之用人  
似貧士市瓜取其大者自居大位門絕私交

楊數字文衍少有志操重然諾仕魏遷廷尉少卿斷獄  
以平允稱子素字處道少落拓有大志不拘小節  
逸羣絕倫非常之器有英傑之表周武帝拜為儀同



三司又賜以竹策曰朕方欲大相驅策故用此物賜卿隋初為行軍元帥伐陳大破之後為太僕射詔曰懷佐時之略抱經國之才論文則詞藻縱橫語武則權奇間出每稟戎律長驅塞垣南指而吳越肅清北臨而獯獫摧服後拜司徒子玄感初拜郢州刺史潛布耳目察長吏能否纖悉必知遷禮部尚書愛重文學四海知名之士多趨其門隋帝好征伐玄感陰求將領帝嘉之曰將門有將故不虛也素弟約字

惠伯煬帝立拜內史令 約從叔巴字文殊髫齡就學日誦千言仕周為寧都太守甚有能名

楊寬字蒙仁通敏有器幹頻牧數州號稱清簡歷居臺閣有當官之譽 子文恩字溫仁仕隋為州刺史甚有惠政及去吏人思之立碑頌德 弟紀字溫範剛正有氣局後除宗正卿判禮部尚書

楊機字顯略為洛陽令京輦伏其威風訴訟者一經其前後皆識其名姓并記其事理歷司州別駕河北太

守並有能名除度支尚書方直之心久而彌厲奉公  
正已為時所稱

楊乾運字元邀歷潼梁二州刺史

楊纂從周文經河橋芒山之戰每先登軍中咸推其勇  
敢遷驃騎大將軍轉華州刺史性質樸不識文字前  
後蒞職但推誠信而已

楊紹字子安為廊城郡守性恕直兼有威惠百姓安之  
子雄仕隋兼宗正卿遷右衛大將軍貴寵冠絕一

時寬容下士朝野顧屬 雄弟達字士達為鄆鄭趙  
三州刺史文帝差品天下牧宰達為第一擢拜工部  
尚書楊素每曰有君子貌兼君子心者惟楊達耳  
楊荐字承畧早有名譽性廉謹喜怒不形於色後使宓  
廐可汗稱旨遷大將軍

楊汪字元度大業中拜尚書左丞明習法令果於剖斷  
號為稱職拜國子祭酒帝令百寮就學與汪講論天  
下通儒碩學多萃焉論難鋒起皆不能屈

楊尚希少入太學周文帝親釋奠令講孝經詞旨可觀  
擢為國子博士仕隋歷兵部禮部二尚書甚有雅望  
為朝廷所重

孝行楊引母終哀毀過禮恨不識父追服斬衰哀慕不  
改詔別敕集書標其至行

楊慶字伯悅居母憂哀毀骨立負土成墳 齊文宣表

其門閭

節義楊善會字敬仁仕隋為郃令以清正聞

唐楊恭仁隋觀王雄子也大業初與屈突通追獲賊煬  
帝曰比但知卿奉法而乃勇決如此蘇威曰仁者必  
有勇殆謂此邪為涼州總管久乘邊習種落情偽頡  
利率衆獵其境恭仁應機設拒張疑屯示之頡利懼  
而走太宗遷洛州都督性沖厚以禮自閑未嘗與  
物忤時人方漢石慶

楊師道字景猷清警有才思貞觀十年拜侍中叅領朝  
政嘗曰吾讀孔光傳想其餘風遷中書令善草隸書

工詩與名士燕集歌詠自適後賜宴帝令賦詩少選  
輒成一坐嗟伏

楊弘禮字履莊素弟之子太宗征遼拜兵部侍郎駐蹕  
之役領步騎二十四軍跳出所向摧靡帝曰越公兒  
郎故有家風

楊弘武遷西臺侍郎

楊再思鄭州人第明經初調玄武尉至京師舍逆旅有  
盜竊之再思曰而苦貧故至此囊中檄汝無所事幸

留他物可持去初不為人言但假貸以還居宰相  
十餘年

楊元琰字溫號州人生數歲未言相者視曰語遲者神  
定必為重器秀眉美鬚崇肩博頤居喪七日不食補  
平棘令課第一御史表其政五遷州刺史咸有風績  
悲涕慷慨志在王室中外食其家常數十人

楊瑒字瑤光華州人為國子祭酒奏有司帖試明經不  
質大義又言舉選多少之限帝然其言在官清白



吏請立石紀德瑒伯父志操頗剛簡未遇時作間居  
賦以自託

楊慎矜隋齊王暕曾孫開元初為太府卿財物羨積如  
丘山歲常受有數百萬任職以戶部尚書致仕

楊綰字公權華州人性沈靜不好立名第進士舉詞藻宏  
麗科綰為冠擢右拾遺制舉加詩賦自綰始肅宗即  
位為中書舍人遷禮部侍郎建復古孝廉力田等科  
天下高其議遷吏部品裁清允人服其公拜中書侍

郎同平章事制下士相賀於朝復太平舊制未幾  
帝驚曰天不使我致太平何奪綰之速耶 綰儉約  
未嘗問生事祿稟造之者清談終晷而不及榮利欲  
干以私聞其言必慚愧止經誥微趣學家疑晦者一  
見即詣其極始輔政御史中丞崔寬豪侈城南別墅  
池觀堂皇為當時第一即日遣人毀之京兆尹黎幹  
出入從騶馭百數省損才留十餘騎中書令郭子儀  
在邠州行營方大會除書至音樂散五之四他聞風靡

然自化者不可勝紀世以比楊震山濤謝安云

楊炎字公南鳳翔人父播舉進士退居歸養號玄靜先生炎美鬚眉峻廉隅文藻雄蔚河西呂崇賁辟掌書記父喪廬墓側有紫芝白雀之祥詔表其閭三世以孝行聞門樹六闕古所未有為中書舍人與常袞同知制誥自開元後言制誥者稱常楊德宗即位拜門下侍郎同平章事建言財賦者邦國大本而生人之喉命先朝權制以中人雖大臣不得知無以計天下

利害臣請出之以歸有司帝從之初定令有租稅庸  
調法自開元承平久不為版籍法度蕪敝而丁口轉  
死田畝換易貧富升降悉非向時炎疾其弊請為兩  
稅法 炎興嶺表以單議悟天子中外翕然屬望為  
賢相

楊朝晟字叔明夏州人興行間以先鋒授果毅李懷光  
反父懷賓為韓游環將斬張昕懷光平父子皆為  
開府賓客軍中以為榮後為邠寧節度使

楊憑號州人善文辭與弟凝凌皆有名大厯中踵擢進士第時號三楊憑重交游尚氣節與穆質許孟容李鄴相友善一時歆慕號楊穆許李凌子敬字茂孝擢進士第平判八等兼太常少卿是日二子戎戴登科時號楊家三喜嘗為華山賦示韓愈愈稱之士林一時傳布李德裕尤咨賞雅愛項斯為詩所至稱之

楊於陵字達夫漢太尉震之裔長有奇志十八擢進士

韓滉謂妻柳氏曰吾求佳婿無如於陵滉居宰相於陵不肯調退盧建昌以文書自娛滉卒德宗聞其名拜中書舍人遷浙東觀察使越人饑請出米三十萬石贍貧民政聲流聞入為京兆尹為嶺南節度使辟李翱在幕府教民陶瓦易蒲屋以絕火患授吏部侍郎器量方正節操堅明終始不失時人尊仰之楊元卿慷慨有術畧時時高論人謂狂生吳少誠跋扈元卿與少誠言君臣大義以動其心及元濟擅襲元

卿欲因其財使不振謬說曰君若大賜將士則諸將  
悅助我為持表見天子元濟許之既至則具條賊虛  
實請敕諸道執元濟拜金吾衛將軍擢涇源渭節度  
使墾廢屯田五千頃涇人德之徙節河陽何進滔亂  
魏博獻粟二十萬石助天子經費

楊嗣復字繼之父於陵始見識於韓滉妻以其女歸謂  
妻曰吾閱人多矣後貴且壽無若生者有子必位宰  
相既而生嗣復滉撫背謂曰名與位皆踰其父楊氏

之慶也因字曰慶門八歲知屬文後擢進士博學宏辭與牛李相善二人引立然不欲越父當國故擢禮部侍郎凡一期得士六十八人多顯官開成初以戶部侍郎同平章事鄭覃與李比廷爭朋黨嗣復曰臣位宰相不能進賢退不肖以朋黨譏非所以重朝廷乞罷帝方委政故慰安之帝問廷英政事嗣復領貢舉時於陵自洛入朝乃率門生出迎置酒第中於陵坐堂上嗣復與諸生坐兩序始於陵在考功擢李師



稷及第時亦在焉人謂楊氏上下門生世以為美

楊虞卿字師皋虢州人父寧有高操擢明經調臨渙主簿棄官與陽城為莫逆交德宗以諫議大夫召城城未拜詔寧即諭與俱來仕終國子祭酒虞卿第進士博學宏辭為校書郎抵淮南會陳商葬其先貧不振虞卿未嘗與游悉所貲助之累擢監察御史穆宗初立逸遊荒恣虞卿上疏諫云云遷禮部員外郎進吏部

楊收字藏之七歲而孤母親授經十三通大義善屬文  
所賦輒就吳人號神童里人造門觀賦詩至壓敗其  
藩收嘲之曰爾非羸角者奚用觸吾藩切當類此及  
壯博學強記至他藝無不通母以奉浮屠不食肉約  
曰爾得進士第乃可食 涪陽耕得古鐘高一尺餘  
收扣之曰此姑洗角也既剖拭有刻在兩樂果然嘗  
言琴通黃鍾姑洗無射三均音韻時有安浼者世稱善  
琴且知音收問五絃外其二云何浼曰世謂周文武

二王所加收曰能為文王操乎浼即以黃鍾之宮而奏之以少商應絃收曰文世安得武聲乎浼大驚因問樂意以兄假未仕不肯舉進士兄假既擢進士自浙西判官擢監察御史收亦自西川遷兄弟同臺世榮其友

楊行密興微賤馳射武伎皆非所長而寬簡有智略善御將士推心待物無所猜忌淮南被兵六年士民轉徙幾盡行密初至賜與將吏帛不過數尺錢不過數

百而能以勤儉足用非公燕未嘗舉樂招撫流散輕徭薄斂未及數年公私富庶廬州蔡儔嘗發行密父祖墓後行密斬儔左右請發儔父母冢行密曰儔以此得罪吾何為效之

楊炯華陰人舉神童遷盈川令張說以箴贈行戒其苛楊思勗給事內侍省從玄宗討內難倚為爪牙

楊國忠善窺上意所愛惡而迎之以聚斂驟遷歲中領十五餘使遷給事中兼御史中丞專判度支事恩幸

日隆蘇冕論曰設官分職各有司存政有恒而易守  
事歸本而難失經遠之理捨此奚據洎姦臣廣言利  
以邀恩多立使以示寵刻下民以厚歛張虛數以獻  
狀上心蕩而益奢人望怨而成禍使天子有司守其  
位而無其事受厚祿而虛其用宇文融首唱其端楊  
慎矜王鉞繼遵其軌楊國忠終成其亂仲尼曰寧有  
盜臣而無聚歛之臣誠哉是言前車既覆後轍未改  
求達化本不亦難乎

五代楊涉祖收唐懿宗時宰相父嚴官至兵部侍郎涉  
舉進士昭宗時為吏部尚書涉唐名家世守禮法  
而性特謹厚不幸遭唐之亂拜相之日與家相對泣  
下顧其子凝式曰吾不能脫此網羅禍將至矣必累  
爾等唐亡事梁為平章事知貢舉子凝式有文詞  
善筆札歷事五朝居於洛陽官至太子太保

楊彥詢字成章河中寶鼎人也少事青州王師範學師  
範聚書萬卷使彥詢掌之晉高祖鎮太原廢帝疑其

貳心擇諸將之謹厚者佐之乃以彥詢為太原節度副使卒贈太子太師

宋朝楊廷璋字溫玉真定人也父洪裕少漁貂裘陂有以二石鴈授之者其翼一拊左一拊右曰吾北嶽使也言訖不知所之是歲生女為周太淑妃明年而廷璋生以淑妃故得賜官世宗即位除節度使國初荆罕儒監晉州兵疑廷璋周之近親欲圖之見必懷刃而廷璋接以至誠卒不敢發初周太祖嘗諭廷璋圖

涇帥史懿廷璋屏左右示以詔書懿受代入朝遂免  
禍時論以罕儒不能加害為若有施報也未幾自鎮  
來朝授靜難軍節度使移鄜州

楊守一字象先其先洛陽人也唐末徙家宋鄭之間初  
名守素太宗為更其名端拱元年除僉書樞密

楊業并州太原人也少任俠善射好田獵謂其徒曰我  
他日為將用兵亦如鷹犬逐雉兔爾弱冠事劉崇累  
遷至建雄軍節度使屢立戰功所向克捷國人號為



楊無敵太宗征太原業據城苦戰及繼元降太宗聞其勇生致之使諭繼元以招之業乃北面再拜大哭釋甲來見太宗得之大喜以為右領軍衛大將軍刺代州子延昭

楊延朗下一字犯始祖名改為延昭用業蔭補供奉官業之死太宗憫之擢延昭崇儀副使契丹入寇延昭在遂城城小無備虜攻之甚急衆心危懼延昭集城下護守偶大寒命汲水注城外及旦悉為冰堅滑不可近

虜遂解去拜莫州刺史契丹復寇邊延昭伏銃兵於  
羊山之西自北擊之且戰且走及伏發虜衆敗績獲  
其名王函首以獻進團練使官至英州防禦使 延  
昭智勇善戰沉嘿寡言寒不披衣暑不張蓋遇敵必  
身先功成推其下故人樂為之用威振異域守邊二  
十餘年虜人畏之呼為六郎

楊礪字汝礪京兆雲人也舉進士甲科真宗為襄王以  
礪為記室始礪隱時嘗夜夢見一人衣冠甚古謂礪

曰汝能從吾遊乎礪隨往頃之覩宮衛嚴邃俄陞大  
殿見一南面而坐者指示礪曰此來和天尊汝異日  
事之礪再拜而退及為記室謁襄王還謂妻子曰今  
日見襄王正昔日夢中所見也真宗即位召入翰林  
為學士咸平元年除工部侍郎樞密副使

楊徽之字仲猷建州浦城人也世尚武力父澄始業儒  
徽之少好學同邑有江文蔚善賦江為善詩徽之遂  
與齊名遊學于廬山是時福建屬江南亦置進士科

以廷士大夫徽之恥之乃間道詣中朝應舉遂登進士第太祖為時望所歸徽之上書言其事及太祖受禪太宗見其書謂太祖曰此周室忠臣也太宗即位入為史館修撰上書曰陛下嗣統鴻圖闡揚文治然擅文章者多獲迅遷明經業者罕聞殊用且京師四方之會太學首善之本今五經博士並闕其員非所以厚人倫獎儒學厲賢崇化繇內及外之道也太宗嘉之顧謂宰相曰徽之儒雅之士宜置之館殿遂判

集賢真宗即位拜樞密直學士兼秘書監咸平初始  
置翰林侍讀學士以徽之為之累官至兵部侍郎

楊億字大年建州浦城人也生之夕其祖文逸夢一羽  
衣自稱懷玉山人覺而億生有毛被其體其長盈尺  
踰月始墮母口授以書隨即成誦七歲善屬文年十  
一以童子召對試詩賦五篇下筆立成太宗歎異以  
為秘書省正字真宗即位拜右正言修太宗實錄大  
中祥符初為翰林學士嘗以疾在告真宗遣使挾太

醫療之億表謝真宗批紙尾賜詩有副予前席待名  
賢之句其顧遇如此億於歷代典章制度尤為該洽  
經傳子史百家之學罔不通貫為文敏贍數千百言  
不加點竄對客談笑揮毫无滯論治道談世務必稽  
古驗今究切利病厚風義重名教誘進後學樂道人  
善賢士大夫翕然宗之真宗嘗謂王旦曰億辭學無  
比後學皆師慕之文章有貞元元和風格自億始也  
卒諡曰文

楊崇勳其先蘇州人也父全美仕太宗為殿前指揮使  
崇勳少以父任為東西班承旨給事東宮真宗即位  
授左侍禁累遷至四方館使屬天下久罷兵有言鬻  
殿馬者崇勳曰馬者兵之用而戰之備也雖無事其  
可去邪議遂格卒諡恭密

楊大雅字子政杭州錢塘人也初名侃後避真宗藩邸  
名而更之唐靖恭虞卿之後虞卿孫承休唐天祐初  
為吳越策禮副使因家錢塘大雅承休四世孫也舉

進士真宗時召試學士院又上書自薦乃直集賢院  
久歷外官直集賢院者二十七年不遷有出其後者  
往往致榮顯或笑其違世自守大雅嘆曰吾不學乎  
世而學乎聖人由是以此吾之所有不敢以薦於  
人而嘗自獻於天子矣拜右諫議大夫集賢院學士  
出知亳州卒

楊察字隱父其先成都人也舉進士召試學士院改著  
作郎直集賢院為開封推官同修起居注出為江東



轉運使部吏頗易其年少及摘發姦伏一路悚慄召  
為右正言知制誥有上書請罷有司糊名考試及變  
文格使為放軼以襲唐體者察謂防禁一潰則奔競  
復起文無今昔以體要為宗若肆其誕謾亦非唐氏科  
選之法議遂寢御史何郊論事不得實問狀察言  
御史故事許風聞若反被責問非所以為人主耳目  
之官也後拜三司使卒諡宣懿察七歲始能言為  
文敏贍

楊遂開封人也少善騎射應募軍中王則反于貝州遂  
穴城以入賊平功第一授神衛指揮使從狄青為先  
鋒至歸仁舖與僮智高遇遂挑戰身被數創手殺數  
十人士卒乘之賊衆奔潰神宗時拜寧遠軍節度使  
卒諡莊敏

楊繪字元素漢州綿竹人也舉進士神宗時為修起居  
注知諫院建言宗室以服屬裁蔭子之數立出官之  
法神宗嘉納向傳範帥京東繪請易其任以杜外戚

僥求神宗曰得卿如此言甚善誠可以止異日佞求也宰相曾公亮用所善曾鞏為史館繪言公亮以朝廷名器為已物乞正招權之罪鞏既罷史官繪亦罷諫職御史中丞滕甫言繪何罪而罷神宗於是詔甫曰繪堅求外補蓋繪未究朕意繪迹跡遠立朝寡黨不畏強禦知無不為朕一見即知其忠直可信故擢置言職知之亦篤矣未閱月再知諫院元祐間復待制知杭州卒

楊傑字次公無為人妙齡擢甲科文行有名于時官太  
常連六七任一朝禮樂皆賴討論遷南呂舍人入侍  
講筵王荊公東坡先生皆欽重之元豐中召對上問  
以佛法有無為集數十卷

名賢氏族言行類稿卷二十二

欽定四庫全書

名賢氏族言行類稿卷二十三

宋 章定 撰

陽 四百三十四

姓纂周景王封少子於陽樊子孫因氏焉晉有陽處  
父魯有陽貨北平無終周末陽翁伯適北燕遂家無  
終秦置右北平因為郡人漢有陽雍於無終山立義  
漿有人遺白石令種之生玉因號玉田陽氏見范通

燕書

左傳昭十七年吳伐楚陽句為令尹卜戰

僖三十二年閻章請平於晉晉使陽處父報之晉楚始通孟子陽虎曰為富不仁矣為仁不富矣

後漢陽球字方正補尚書侍郎嫺達故事章奏處議為臺閣所崇信遷司隸校尉既誅王甫等迺敕中都官從事曰且先去大猾當次按豪右權貴聞之莫不屏氣諸奢飾之物皆各緘滕不敢陳設京師畏震

晉載記陽裕字士倫叔父耽幼而奇之曰此兒非惟吾  
門之標秀乃佐時之良器幹事之才能慕容銑拜郎  
中令遷大將軍左司馬謙恭清儉剛簡慈篤士大夫  
流亡羈絕者莫不經營收葬存恤孤遺初盧諶每曰  
吾及晉之清平歷觀士多矣忠智簡毅篤信義烈如  
陽士倫者實亦未幾

陽騫字士秋素好學器識沉遠為平州別駕屢獻安時  
彊國之術慕容銑即位遷左長史東西征伐參謀惟



惺忠幹貞固可托付大事後為太尉清貞廉謹老而彌篤性儉約常乘弊車瘠馬

南史孝義陽黑頭四世同居詔表門閭蠲租賦

北史陽尼字景文李沖以尼碩學舉為國子祭酒後兼州中正孝文令諸州中正各舉所知尼舉其子帝曰昔有一祁名垂往史今有二奚當聞來牒從孫固字敬安倣儻不拘小節博覽篇籍有文才累遷侍御史多所劾奏宣武廣訪得失固上讜言表請早正東

儲後免官著演贖賦以明通塞之事又作刺殘疾嬖  
幸詩剛直雅正不畏強禦居官清潔家無餘財子  
休之字子列雋爽有風槩好學愛文藻語曰能賦能  
詩陽休之仕除散騎常侍監修起居注後除中山太  
守在郡三年再致甘露之瑞又除吏部尚書凡所選  
用才地俱允典選稍久非所好每曰此官實自清華  
但煩劇妨吾賞適真是樊籠矣早得才名為人物  
所傾服固從兄藻字景德涉獵經史位中書博士

子斐字倣鸞仕魏為散騎常侍聘梁梁尚書羊侃與斐故舊欲召斐至宅相見三致書斐終辭焉還除廷尉少卿固從弟昭字元景學涉史傳尤嫻案牘仕齊為墨曹參軍子靜立性淳孝操履清方仕齊位

三公郎中

陽雄字元略善附會能自謀身故任兼出內保全爵祿唐陽嶠其先北平人世徙洛陽北平齊尚書左僕射休之四世孫舉八科皆中謹飭好學喜誘勸後生以清

白聞

陽城字亢宗定州人資好學貧不能得書求為吏隸集  
賢院竊院書讀之晝夜不出戶六年無所不通及進  
士乃去隱中條山與弟堦域常易衣年長不肯娶謂  
弟曰吾與若孤惻相育既娶則間外姓雖共處而益  
疏弟義之亦不娶謙恭簡素遇人如一遠近慕其行  
來者接迹于道閭里有爭訟不詣官而詣城決之  
有家奴化其德亦方介自約哀其餒與之食亦不內

李泌薦之朝詔以著作郎召城封還詔泌為相又言  
德宗召拜諫議大夫城褐衣到闕下辭讓帝遣中出  
緋衣衣之初未起搢紳想見其風采處諫議以為且  
死職天下亦憚之裴延齡誣逐陸贄時無敢言者城  
聞曰吾諫官不可令天子下殺無罪臣乃守延英閣  
上疏極諫累日不止聞者寒懼城愈勵帝大怒不已  
欲相延齡城顯語曰延齡若相吾當取白麻壞之哭  
於廷帝不相延齡城之力也坐事下遷國子司業引

諸生告之曰凡學者所以學為忠孝也諸生有久不  
省親者可歸省躬講經籍生徒斤斤皆有法度薛約  
者狂而直言事得罪謫連州吏捕迹之城家帝惡城  
黨有罪出為道州刺史太學諸生何蕃等二百人頓  
首闕下請留城為吏遮抑不得上至道州州產侏儒  
歲貢諸朝城哀其生奏罷州人感之以陽名子賦稅  
不時觀察使數誚責州當上考功第城自署曰撫字  
心勞追科政拙考下下陽城德行道義為士林之

所敬服德宗以銀印赤紱起于隱所驟拜諫官可謂  
賢且遇矣故學生聞道州之貶投業而叫閭賢士愴  
驛名之同摛辭而頌德可以知其賢不誣也然韓退  
之爭臣論乃極口詆之何哉考之本傳以謂他諫官  
論事苛細帝厭苦城浸聞得失日熟猶未之言客屢  
諫之第辭以酒而不答蓋其以有待也至德宗逐陸  
贄欲相裴延齡而城伏闕之疏始上諫爭懇至累日  
不解故元微之詩云貞元歲云暮朝有曲如鈎飛章

八九上皆若珠暗投且曰事不止臣諫誓不休而白  
樂天詩陽城為諫議以正事其君其手如屈鐵舉必  
指佞臣卒使不仁者不得秉國鈞柳子厚亦云抗志  
厲義直道是陳蓋退之爭論乃在止裴延齡為相之  
前而三子頌美之言乃在陽城極諫之後爾

見葛常之韻語

陽秋

陽惠元平州人以趨勇奮以兵三千擊田悅有功

羊

四百三十五



姓纂晉羊舌大夫之後生職生赤伯華生肸叔向叔  
魚生食我春秋末始單姓為羊氏秦亂徙居太山

叔向晉大夫羊舌肸書遺子產諫鑄刑書 衛人使屠

伯饋叔向羹與錦叔向受羹反錦 叔向古之遺直

三數叔魚之惡

後漢羊續字興祖為南陽太守入界羸服間行觀歷縣  
邑採問風謡然後乃進 府丞嘗獻生魚受而懸於  
廷

黨錮羊陟字嗣祖清直有學行遷冀州刺史奏按貪濁  
所在肅然拜河南尹計日受俸禁制豪右京師憚之  
晉羊祜字叔子世吏二千石至祜九世並以清德聞  
墾田襄陽大獲其利在軍常輕裘緩帶身不披甲入  
綜機密出統方岳常造峴山置酒言詠終日不倦及  
卒襄陽百姓於峴山建廟立碑望其碑者莫不流涕  
因名墮淚碑位太傅平吳之功祜實啓之

羊曼字祖延與阮放等八人號兖州八伯而曼為黯伯

蓋擬古之八雋後為丹陽尹

外戚羊琇字稚舒皇后之弟累遷至散騎常侍在職十三年典禁兵預機密寵遇甚厚性豪奢作獸炭以溫酒黨慕勝已

羊鑒字景期

羊玄之惠皇后父遷右僕射加侍中

南史羊欣字敬元曾祖忱晉徐州刺史欣泛覽經籍尤長隸書為新安太守在郡四年簡惠著稱嘗曰人生

仕宦至二千石斯可矣轉義興太守稱病免歸

羊玄保祖楷晉尚書都官郎玄保善奕碁宋文帝亦好  
奕與賭郡玄保戲勝以任宣城太守歷丹陽尹會稽  
吳郡太守以其廉素寡欲故頻授名郡為政雖無殊  
績而去後常必見思

羊侃字祖忻歸梁為侍中武帝置武宴詩示之侃即席  
應詔帝覽曰吾聞仁者有勇今見勇者有仁可謂鄒  
魯遺風英賢不絕 少雄勇旅力絕人

羊雅仁字季穆歸魏梁征伐青齊間累有功績位至司

空刺史

北史羊祉字靈祐性剛愛刑仕魏假節龍驤將軍為秦

梁二刺史當官不憚彊禦朝廷以為剛斷每令出使

頗為深文所經之處人號天狗下及子深字文泉

遷駕部郎中時沙汰郎官深以才堪見留在公明斷

深子肅以學尚知名為武德郡守子敦字元禮

為本州別駕公平正直見非法終不判署為廣平太

守甚有能名姦吏跼蹐秋毫無犯 從弟烈字信卿  
以玄學知名除陽平太守蝗不入境敕書褒美遷光  
祿少卿家傳素業閨門修飭為世所稱一門女不再  
醮

羊士諤不知何許人有尋山家詩曰主人閒語未開門  
繞籬野菜飛黃蝶苔溪漁隱甚稱之

姜 四百三十六

姓纂炎帝生於姜水因氏焉生太公封齊為田和所

滅子孫分散後為姜氏因天水上邽縣漢初以豪族徙關中遂居天水

後漢姜肱字伯淮與二弟仲海季江俱以孝行著聞友愛天至常共卧起桓帝徵使畫工圖形狀肱卧於暗以被韜面工竟不得見之

姜詩事母至孝赤眉散賊經詩里弛兵而過曰驚大孝必觸鬼神後察孝廉顯宗詔曰大孝入朝拜為郎

妻龐盛之女奉順尤篤母好飲江水嗜魚鱸舍側忽

有湧泉味如江水每旦輒出雙鯉魚

蜀志姜維字伯約思慮精密涼州上士也敏於軍事才兼於人極上將之重而側室無妾媵之褻後庭無聲樂之娛

唐姜謩秦州上邽人大業末為晉陽長薛舉寇秦州以謩山西豪望詔安撫隴外後仁果平拜秦州刺史帝曰昔稱衣錦故鄉今以本州相授所以償功涼州荒梗宜有以靖之謩至撫邊以恩信人喜曰不意復見太



平官府

姜確字行本以字顯貞觀中為將作少匠以幹力稱高  
昌之役為行軍副總管出伊州距柳谷百里依山造  
攻械其處有漢班超紀功碑行本磨去古刻更刊頌  
陳國威靈進平高昌戰有功璽書慰勞居官雖祁  
寒烈暑無懈容

姜皎長安中為尚衣奉御帝以藩邸舊恩遷太常卿  
姜晦起家蒲州參軍為高陵令治有聲人畏愛之擢御

史中丞振臺儀轉太常少卿時馬乏請詔市馬改兵部滿歲為吏部侍郎主選曹史處事精明皆以為神人云

姜師度魏州人調丹陵尉龍岡令有清白稱為河北巡察度支營田使始鑿溝薊門以限奚契丹廝平虜渠以通餉路罷海運省功多遷司農卿太原倉水陸運所湊使依高為厩而注米于舟故人不勞進為河中尹置鹽屯公私收利不貲徙同州刺史收棄地二千

頃為上田置十餘屯

姜公輔愛州人第進士以制策異等有高才每進見敷奏詳亮德宗器之朱泚還京師公輔請帝誅之不從俄而涇師亂帝自苑門出公輔叩馬諫曰請取朱泚不聽後泚兵至果如所言擢諫議大夫同平章事宋朝姜遵字從式淄州人也舉進士知廬陵縣召為監察御史殿中侍御史開封府判官知吉州高惠連與遵有隙發遵在廬陵時贓事按驗無狀猶降通判延

州復入為御史仁宗時以刑部郎中兼侍御史知雜事遷右諫議大夫知永興軍奏罷咸陽貢粢召拜樞密副使卒贈吏部侍郎遵長於吏事治尚嚴猛

梁

四百三十七

姓纂嬴姓伯益之後秦仲有功周平王封其少子康於夏陽是為梁伯後為秦所滅子孫以國為氏晉有梁益耳梁弘梁由靡並其後也安定烏氏縣梁和以豪族自河東徙烏氏

左傳昭五年韓起之下梁丙張骼苗賁皇皆諸侯之選也

新序刺奢齊景公飲酒而樂自鼓缶謂侍者曰仁人樂是夫梁丘子曰仁人耳目亦猶人也奚為不樂

史記梁鱣

一作鯉

字叔魚孔子弟子家語曰齊人

前漢儒林梁丘賀字長翁瑯琊人受易入說為郎以筮有應由是近幸至少府小司馬周憲上信重之子林亦入說為黃門郎

後漢梁統字仲寧光武拜太中大夫在朝廷所陳便宜  
出為九江太守吏人畏愛之子竦字叔敬閉戶自  
養以經籍為娛作七序而竊位素餐者慚嘗嘆曰大  
丈夫居世生當封侯死當廟食不然閉居可以養志  
詩書足以自娛州郡之職徒勞人耳後辟命交至並  
無所就

梁商字伯夏順帝立其女為后加商位特進以戚屬居  
大位每存謙柔虛已進賢京師翕然稱其良輔子

冀字伯卓鳶肩豺目見帝甚驕橫目曰跋扈將軍

梁鴻字伯鸞勢家慕其高節多欲女之並絕不娶孟氏  
有女擇對不嫁父母問曰欲得賢如梁伯鸞者鴻聞  
而聘之字曰德耀過京師作五噫之歌妻每具食  
舉案齊眉

魏志梁習字子虞領并州刺史邊境肅清百姓布野勤  
勸農桑令行禁止長老稱詠以為自所聞識刺史未  
有及習者政治常為天下最徵拜大司農在州二十

餘年居處貧窮無方面珍物

北史梁覽字景叡其先世為部落酋帥家世豪富貲累千金在魏歷梁河二州刺史盛修甲仗人馬精銳吐谷渾憚不敢出皆曰梁公在未可行也

梁禦字善通從周文復弘農破沙苑為大都督雍州刺史為政舉大綱人庶稱之 子睿字恃德少沉敏有行檢後為益州總管威惠兼著人夷悅服

梁椿字千年仕周拜大將軍善於撫納所獲賞物分賜



卷二十三  
麾下故咸得其死力

梁臺字洛都仕周拜大將軍果毅膽決不可及拜鄜州刺史尤以惠愛為心

梁昕字元明除河南郡尹遷荊州刺史撫以仁惠蠻夷悅之性溫裕有幹能歷官內官咸著聲稱

梁士彥字相如任俠好讀兵書周武帝聞其勇決除為鎮將齊人甚憚之除晉州刺史齊師攻之樓堞皆盡士彥慷慨自若將士齊奮無不一當百齊師遂却

梁毗字景和隋時以鯁正拜書侍御史

遷雍州贊

務直道而行無所回避

始毗為西寧州刺史夷酋

長皆以金多者為豪雋爭相攻奪毗患之後因諸酋  
長相帥以金遺毗毗置金坐側對之慟哭而謂之曰  
此物饑不可食寒不可衣汝等以此相滅不可勝數  
今將此來欲殺我耶一無所納於是蠻夷感悟遂不  
相攻擊上聞善之徵為大理卿

儒林梁越字玄覽博通經傳魏初為理經博士道武以

其謹厚遷上大夫明元初賜爵祝阿侯

梁祚為中書博士撰國統又作代都賦

循吏梁彥光字修芝相州刺史

曹梁文貞少從軍守邊逮還親已亡自傷不得養即穿  
牆為門晨夕汎掃廬墓左喑默三十年家人有所問  
畫文以對有甘露降瑩木白兔馴擾縣令刊石紀之  
五代梁震唐末登第開平間歸蜀過江陵高季昌甚重  
之以為謀主呼曰先生不名謂從誨曰先王待我如

布衣交以嗣王囑今嗣王能自立不墜其業吾老矣  
不復事人矣遂固請退居從誨為築室於土洲震披  
鶴氅自稱荆臺隱士每詣府跨黃牛至廳從誨時過  
其家 司馬溫公曰孫光憲見微而能諫高從誨聞  
善而能徙梁震成功而能退自古有國家者能如是  
夫何亡國敗家喪身之有

宋朝梁周翰字元褒鄭州管城人也幼好學能為文章  
周時舉進士為虞城簿乾德中太祖大修宮闕周翰

為五鳳樓賦以進李昉為相以其名聞于太宗召遷起居舍人真宗為皇太子知其名及即位拜翰林學士罷為工部侍郎卒

梁顥字太素鄆州須城人也舉進士太宗召升殿擢冠甲科為大名府觀察推官遷右拾遺真宗幸大名訪羣臣邊事顥上疏曰陛下命將出師乘秋備塞大將傅潛奉明詔握重兵逗撓無謀遷延翫寇守陴塞壘巽懦以自全銳卒精兵局束而不用以至胡馬南牧

蹂踐河朔此以賊遺陛下者也陛下赦而不誅則何以慰橫死之民出而不戮則何以恢用兵之略耶除翰林學士知開封府卒

梁適字仲賢顥之子也適少孤輯顥制詔并自為文以獻真宗曰梁顥有子矣授祕書省正字舉進士改太子中允知淮陽軍召為審刑院詳議官梓州有妖人依鬼神以詛殺人獄具以不傷讞適曰殺人以刃或可拒而詛可拒乎是甚於刃也卒以死論 儂智高

圍廣州官軍數戰不利仁宗欲降之會得賊為牒言  
智高欲得邕桂七州節度使者適曰若爾廣非朝廷  
有矣乃命狄青為宣撫使討之及賊平仁宗曰向非  
適言南方安危正未可知也尋拜參知政事 契丹  
欲易國書曰兄弟之義自今宜稱南北朝適曰宋之  
為宋受之於天不可改也契丹亦其國名自古豈有無名  
之國哉遂止上擢進禮部侍郎同中書門下平章事神  
宗即位太子太傅卒諡莊肅

梁燾字況之鄆州人也父舊兵部員外郎燾以廕為太廟  
齋郎舉進士中第編校秘閣書籍元祐初遷右諫議  
大夫御史張舜民以言事坐左遷臺諫官皆論以為  
非是燾以謂御史持紀綱之官得以犯顏正論況臣  
下過失安得畏忌不言哉今御史敢言大臣者天下  
之公議大臣不快御史者一夫之私心屈天下之公  
議快一夫之私心非治朝之美事也元祐七年拜尚  
書左丞



梁克家字叔子溫陵人紹興間擢進士第一人後自初  
名九年不歷外任致位宰輔再相凡四年卒諡文靖

事業國史有傳

見清源志

涼 四百三十八

涼茂字伯芳代居山陽議論常據經典以處是非為太  
守旬月之間襁負而至者千餘家魏初遷僕射復為  
太子太傅甚見敬禮

房

四百三十九

姓纂帝堯子丹朱封為房邑侯子陵以父封為氏陵  
四十八代孫雅王莽末為清河太守始居清河雅十  
九代孫謚慕容德南遷因居濟南郡生四子豫坦遂  
熙號四龍今稱四祖房氏

北史房法壽仕宋為魏郡太守性愛酒好施坎壈常不  
豐足 曾孫豹字仲幹州辟主簿仕齊拜西河太守  
政貴清靜甚著聲績遷博陵太守亦有能名又遷樂  
陵太守風教修理稱為美政 玄孫彥謙通涉五經

雅有詞辯風槩高人為齊州主簿清簡守法州境肅然敬憚遷長葛縣令甚有惠化百姓號為慈父使者察長吏能否以彥謙為天下第一起授荊州司馬吏人號泣曰房明府今去吾屬何用生為百姓思之立碑頌德其後朝廷以其公方宿著時望所歸授司隸刺史彥謙亦慨然有澄清天下之志凡所薦舉皆人倫表式其有彈劾當之者曾無怨言所遺子孫在於

清白

子玄齡

見唐書

房景伯字良暉彥謙之族子累遷齊州長史行州事政教寬簡百姓安之崔德韶每云景伯有士大夫之行業

房亮字景高好學節操舉秀才歷濟北平原二郡太守以清嚴稱

房謨字敬放深沉內敏歷昌平代郡太守所在著廉惠為兗州刺史選用廉清廣布恩信世稱清白子恭懿字慎言仕隋為新豐令政為三輔最每朝日必呼至

榻訪以化下之術 諸州朝集稱為勸勵之首

儒林房暉遠字崇儒世傳儒學明三禮傳詩書易遠方  
負笈而從者動以千計牛弘稱為五經庫仕至國子  
博士

唐房玄齡字喬齊州臨淄人幼警敏善屬文書兼草隸  
十八舉進士高孝基名知人見之曰僕觀人多矣未有如  
此郎者當為國器但恨不見其聳壑昂霄云太宗以燉煌  
公徇渭北杖策謁軍門一見如舊公為秦王即授記室封


臨淄侯征伐未嘗不從衆爭取珍怪獨收人物置幕府與  
諸將密相申結王嘗曰漢光武得鄧禹門人益親今我有  
玄齡猶禹也居府十年軍府符檄駐馬即辦文約理  
盡高祖曰若人機識是宜委任每為吾兒陳事千里  
外猶面語為中書令第功班賞與如晦等功第一  
帝曰玄齡有決勝帷幄定社稷功居宰相十五年女  
為王妃男尚公主自以權寵隆極累表辭位帝曰一  
日去良弼如亡左右手會伐遼留守京師詔曰公

當蕭何之任朕無西顧憂矣 玄齡數上書勸帝毋  
輕敵久事外夷 玄齡當國夙夜勤彊任公竭節不  
欲一物失所聞人善若已有之治家有法度常恐諸  
子驕侈席勢凌人集古今家誠書為屏風令各取其  
一具曰留意於此足以保躬矣

房琯字次律河南人少好學風度沈整與呂何偕隱陸  
渾山十年不諧際人事開元中作封禪書說張說說  
奇之舉任縣令科為縣所至尚德化興長利以治最

顯天寶試給事中時玄宗有逸志數巡幸以瑄資機  
筭詔總經度驪山瑄有重名帝傾意待之以忠誼  
自奮片言悟主而取宰相第五琦言財利瑄諫曰  
往楊國忠聚斂產怨天下今又寵琦是一國忠死一  
國忠生無以示遠方族孫式擢進士第累遷忠州刺  
史





名賢氏族言行類稿卷二十三

顯天寶試給事中時玄宗有逸志數巡幸以瑄資機  
筭詔總經度驪山瑄有重名帝傾意待之以忠誼  
自奮片言悟主而取宰相第五琦言財利瑄諫曰  
往楊國忠聚斂產怨天下今又寵琦是一國忠死一  
國忠生無以示遠方族孫式擢進士第累遷忠州刺  
史



名賢氏族言行類稿卷二十三